

夕風雨橫江艤舟于岸逮中夜而作

初三日晚至和尚港其港遶山周回首尾通江  
僅百餘步港之兩岸柳陰茅屋豚柵鷄埭儼  
然如市次至黃蓬磯獨一山枕于江岸又之  
響糠硿磯有觀音洞又南之雲頭磯雲峯侵  
冲漠狂瀾回注舟子莫能支沿崖而撻者蟻  
附又之鵝兒磯山青雲白耕牧雜然于下有  
政平訟理之氣象又之望夫磯其山連亘僅  
一里惟石巉巖芳草叢綠又之米石驛時將  
及午入支江上有李公墓俗謂此地多旨酒  
以故居者樓閣重重臨流而市酒者比他率  
多又南二十里觀黃山又二里許望太平皆  
出支江之左也又三十里許曰東梁山在大  
江之左支江之右山勢甚恠西梁山又在大  
江之右與東梁山相望其勢相若此處出支  
江入大江亦扼要地有大信巡司在焉治居  
支江之左暮泊黑山磯是夕風雨大作中夜  
而興

初四日早至櫓港驛風雨如昨驛治在江之東  
岸近荻港有板子磯如米石支江抱一小山